

Melele xa aveti na Elsavet be tei e he sav (6), Hi misil masxaxa Kavriyel be taon te hal Nasaret xa de provins te hal Kaleli. Kavriyel nggur sepinien tei tangan ha ihit mesen ni mi ate maxoe tei, hisen Meri. Meri, latesikoe xole tuei tangan vateli vatel moletin tei, hisen Siosep, xa nggo vatimol na suv toto Deved tetiamu.



Di, masxaxa biteni mi Meri bit,
"Meri, ulum nakan ti. Hi besi xi
pupu ve xouk. Xouk uti ni tuvava
tei e ulingi ihe horamue. Ti,
uling hisen ihe 'Iesu' xa
koute teni be 'Hi di miteh
meulien e moletin xil.' Xi
ihe eilep tei xa likesi ni
'Nat Hi xa de ut nesao.' E
Hi Suv ipol ni mei ihe suv toto
ixoni avu nan tetiamu, suv toto
Deved. Xi ilaxat kuh mol-Isrel xil

vehakut, xa latexo ra na avu
Siekob tetiamu. E lelaxatien
nan, hoxalite teni ihe tovuol."



Meri bit rilomun ni mi masxaxa bit,
“?Inou niti ni tuvava itep, vengan
xa natakil ti mu tiramue?” Ma
masxaxa biteni mi Meri bit,
“Ninin Eo imei visal
xouk, e xeihen na
Hi isak ni xouk
uti ni tuvava. Ve
rin ak, horamue
xa ulingi ihe eo,
e likesi ni
'Nat Hi.'”



Dutou ni melele nen ak, Meri mea e mitemanon
be metimal xa Elsavet da en xa de vathu
xil te provins te hal Sudea. Melele xa duxoh
metimal ak, be vangit
nim ma Sakaraea xalu
e mikes Elsavet. E
melele xa Elsavet
milong rae Meri,
tuvava nan nggelial e
vangen. Di, Ninin Eo
mei mise xat Elsavet
xa miki be nesao bit,
"!Tuxolxatien na Hi di
minuk mili atou sav xil,



e tuxolxatien nan di mi
tuvava xa de vangom!"



Ngan ak be tumulen usil naha
xa testal tetiamu ni poten
na Iesu xa tehe Mesaea
na Hi. Meri xa ihe nine
Iesu, latesikoe xole ngamu
tengan mei ihe atou na
Siosep. E melele xa
lutnati vituei ti mu,
latekameti xa Meri
teti tuei ni tuvava texo
xeihen na Ninin Eo.



Vengan xa Siosep, tiramue na Meri, sexien nan xil momal pe met Hi, xi tenemi tehit isil rati. E xi ien ti tavei vapol ni Meri vahe unoun pe met moletin xil. Ma xi bit xalu lalitasil e suse xa moletin xil linakil ti.



E melele xa Siosep di tamu minem usil rin ak,
masxaxa tei na Hi Suv mei mistal mini e
metuveen tei e biteni mini bit, "Siosep,
vatimol na suv toto Deved tetiamu,
ulum nakan ti tangan uhur Meri
ihe atou nam, vengan xa tuvava
xa di ni nggo xeihen
na Ninin Eo."



"Meri iling horamue ak, e xouk uling hisen ihe 'Iesu' xa koute teni be 'Iahova di miteh meulien,' vengan xa xi iteh meulien e moletin nan xil ra tesaen nae xil."



Melele xa Siosep milale, xi pol nggusil naha xa masxaxa na Hi Suv tesemae ni mini. Ma xi nggur Meri mei be atou nan e ludi vituei. E xi tapat ti vatela ba duxoh melele xa Meri miling horamue nan. E melele xa miling horamue ak, Siosep miling hisen be Iesu.



E melengien xil ak xa
Sion tepot en, Okastas
tehe Sisa te hal Rom.



Xi tesa rae nan teha mi eilep nan xil te kavmen tehiti
ha litis xat his moletin xil ngasen te ut xil vus tangan
Misak ni, moletin xil ngasen
latetilomun latehe metimal
xati na vatimol
nae tangan ngan
xil te kavmen



lakila livuli kuh xil e lihur hisexil.



Misak ni, e melele nen ak, Siosep mea, be reling
metimal te hal Nasaret xa de provins te hal Kaleli.
Di, nggusil suse xa teviei
ba be Betlehem xa de
provins te
hal Sudea.



Be Betlehem vengan xa be metimal xati na suv toto
Deved, e Siosep be vatimol tei nan. Siosep nggur Meri
lukakao lube Betlehem,
vengan xa tesikoe xole
ngamu tangan
ihuri mei ihe
atou nan.



Meri, navehi ti iling tuvava.



E melele xa ludi tamu
e metimal te hal
Betlehem, melengien
nan pipin tangan
valing tuvava.



Xalu luba ludi e nim ma vongoro xil vengan xa ut sav
tovuol e nim tangan laloti en. E inggak, Meri miling
muimol nan xa be malohos. Pis
xole ni kaliko tei, di milingi pat e
rute xa di laling
husmunae a
vongoro
xil en.



E vongien nen tak, moletin tatei xil di lalaxat sipsip xil
e valkesao tei sangas visal metimal te hal Betlehem.
Vatei takes, masxaxa tei na Iahova
bemei mistal mi xil, e
minehinen
te xeihen
na Hi mileluv
xol moletin
xil ak. ✦



Xil latemanin e uli mikan pupu. E masxaxa biteni mi xil bit, "Ulimim nakan ti! Namei del longeongen hos tei xa isak ni moletin xil ngasen mei lipolu ni sien. Taxeak, e

hal
Betlehem,
metimal na
suv toto
Deved +

tetiamu, moletin
te teh meulien en
pot tuei ve xamim."



"Xi be Mesaea xa Iahova tehit xati xa isa ni imei.
Suse xa mupus kila en imak: mukamet tuvava tei xa
lapis xole ni kaliko tei e lalingi pat
de rute xa di laling

husmunae
vctfa
vongoro
xil en."



Melele xa masxaxa di tamu misepin, vatei takes,
vanut masxaxa tei xa mahulong pupu
langgo ut nesao e mei lastal.



E pe met moletin xil ak, lames Hi nggo kikeien labit,
"Merereen mi Hi xa de ut nesao, e ut
etan tomat iti mi moletin xil ngasen
xa Hi



memaal
ve xil."



Melele xa lakikei bus, masxaxa xil labe reling xil e
ladilomun labe ut nesao. Di, moletin xil xa di lalaxat
sipsip xil lasem xil labit, "Rave Betlehem, rava rapus
ti neta xa Iahova tehiteni mi xir."



Ma xil latemanon laba e lakamet rute xa Meri xal Siosep ludi en. E lapus tuvava nalu di pat de rute xa di laling husmunae a vongoro xil di en.




Melele xa moletin xil ak lapus tuvava
Iesu, labit mesen sepinien xa masxaxa
tehiteni mi xil usil tuvava ak mi xalu.



Iesu tepot e metimal
te hal Betlehem xa de
provins te hal Sudea,
e melele xa Herod
xa Mahulong
tehe suv toto

te provins ak. E dutou ni poten
na Iesu, rut eilep xil langgo ist e
lamei e taon te hal Serusalem.
Eilep xil ak langgur kilakilen
tengan lipus kil naha xa istal e ut
etan nggo suse na hitu xil.



E melele xa lastal e
hal Serusalem, lasis
moletin xil labit,
"?Tuvava xa tepot
be suv toto na
Siu xil da

xave? Vengan melele xa
mateti tamu e ut samem e ist,
matepus kokot ni xa hitu nan
testal. Ve rin ak, mamei taxeak
tengan masa merereen mini."



Melele xa suv toto Herod
xa Mahulong milonge
mak, mikes xuxus ni
eilep xil ak tangan
lamei visali. Di, misis
pilei xil tangan lihiteni
mini melengien xati vari
xa xil latepus rohon ni
xa hitu ak testal.



Di, Herod misil xil labe
Betlehem e biteni mi
xil bit, "Muha mulang
kuhi ni horamue ak. E
melele xa mukameti,
mutilomun mei muhiteni
minou tangan xa inou
mun niha nimot mini."



Melele xa eilep xil ak lalong sepinien na suv toto, laba tangan lalang ni horamue ak. E melele xa di langgusil suse nae laba, hitu xa latepusi tetiamu melele xa lateti tamu e ist mistal rilomun. E melele xa lapus hitu ak, labesi xil pupu. Ma melele xa labe nim, lapus horamue del ninen Meri ludi. E melele xa lapus horamue ak, latingeiril e lasa merereen nae mini.



Di, laleh rerat sanien hos nae xil e lasa ni mini. Xil lasa gol, forangkansen, e mir. E vongien, Hi misep xol xil nggo metuveen tei xa linatilomun ti mun linave visal Herod. Ma xil langgusil suse sav ladilomun labe tim sae.



Melele xa eilep xil ak
ladilomun laba, masxaxa tei
na Hi Suv mei mistal mi
Siosep nggo metuveen tei e
biteni mini bit, "¡Tamea!
!Temanon, hur horamue
xal ninen, e mutilesae
mutihe Isip! Mutiti
rute ak ituxol melele
xa inou

nihit mutilomun en.



"Upol ni imak vengan xa,
navehi ti, Herod ilang ves
horamue ak tangan vahas
vini." Misak ni, e vongien
nen tak, Siosep mea po xat
horamue e, del ninen,
latlesae latbe kantri
te hal Isip. Latodi rute
ak ba duxoh melele
xa suv toto



Herod xa Mahulong mat.




Ngan ak mistal tangan
vapol ni sepinien na Hi
Suv xa tehit lelen ni
texo provet Hosea mei
mistal be reitin xa
tehit, "Nakes
natuxoli tangan
imea ra hal Isip."



Melele xa Herod minem kila xa eilep xil te hal ist lateluvosi, ien mikat pupu. Ma, misemae ni moletin te vaeen nan xil tangan lihe metimal te hal Betlehem e ut xil mun xa di sangas tangan ha lihas



malohos
xil



ngasen xa huram
nae lu e be tan.



Herod pol ni mak nggusil
melele xati xa eilep xil
te hal ist latehiteni mini
xa latepus rohon ni hitu
ak testal.



Melele xa xatel latodi tamu e
kantri te hal Isip, Herod xa
Mahulong mat. Ma masxaxa
tei mei mistal mi Siosep
nggo metuveen tei e biteni
mini bit, "Tamea! Utel
horamue xal ninen
muttilomun mutihe tan
na mol-Isrel xil,

vengan xa ngan xil
xa latehit lihas vin
horamue ak, lalel tuei."



E melele xa Siosep
milongeong ni xa
Arkelaos nggur vonine
tamen, Herod xa
Mahulong,



mei be suv toto te
provins te hal Sudea, xi ulin mikan
tengan latohe rute ak. E Hi mun mike xati
nggo metuveen tei tangan latnava ti Sudea.



Ma latbe provins
te hal Kaleli e latdi
rute ak e taon
te hal Nasaret.



Ngan ak misak ni naha
xa Hi Suv tehit lelen ni texo
provet xil mei mistal be reitin xa
tehit, "Likesi ni ngan Nasaret tei."



E vengan xa eheien na Hi di e moletin
xil vus te ut etan holu xa holu pupu, xi
temaen xoteh meulien na Natneli xa
be siskes nan tangan ngan xil vus
xa laneket en lasakras lakesae,
e ha lihur meulien
sal sung.



Rom 3:23 Vengan xa moletin xil vus lapol misa, lasakras latuxoh hosien xa eilep xa Hi teling xati tangan moletin xil liti en.

Rom 6:23 Vengan xa huit polien te tesaen nar xil be maten. E Hi di misa meulien sal nggoni sanien tei mi xir vus xa di rabisti del Iesu Kristo, Suv nar.

Hibru 9:27 Hi teling xati xa moletin xil vus lilel vatei takes. E itutou sung, xil lisoh pe meten e kot nan tangan ilepis rin nae xil.

Efeses 2:8 Io, texo eheien hos na Hi kestang, xi teteh meulien e xamim vengan xa di muling nenesien namim e Kristo. Mutahur meulien sal ti vaxo neta tova xa xamim tang di mupol ni. E-e, meulien sal ak be sanien tei xa Hi vari iaxa di misa ni.



Efes 2:9 Reitin, meulien ak tave huit polien
na moletin ti tangan ti vasep koai ven.

Rom 10:9,10 Vengan xa xosxa mubit rati nggo
vulongomim xa Iesu be Suv namim, e muke reitin en nggo
tinemim xa Hi tesak ni teme rilomun ra maten, Hi iteh
meulien e xamim. Vengan xa melele xa moletin tei mike
reitin nggo tinen, Hi pusi nggoni ngan xa momal ngamu pe
meten. E melele xa bit rati nggo vulongen, Hi di
mih meulien en.

Sion 3:16 E vengan xa eheien na Hi di e moletin xil vus te
ut etan holu xa holu pupu, xi temaen xoteh meulien na
Natneli xa be siskes nan tangan ngan xil vus xa laneket
en lasakras lakesae, e ha lihur meulien sal sung.



Sion 3:17 Hi tenasa Natneli ti tenamei e ut etan tangan
valepis rin na moletin xil e vasa pangasien mi xil ve
sexien tesa nae xil. E-e, Hi tesa Natneli teme i tangan
vahe suse xa iteh meulien na moletin xil te
ut etan ixo en.

1 Sion 5:11-13 Naha xa Hi di biteni mak: Hi misa meulien
sal mi xir, e tepol ni Natneli mei be suse teni. Mak, ma
moletin xa bisti del Nat Hi, xi nggur meulien sal. E
moletin xa tavisti ti vatel Nat Hi, xi tahur ti meulien sal.
Di nadis bat mi xamim xa muke reitin e Nat Hi tangan
mukila xa di munggur meulien sal ngamu.



Matiu 1-2; Luk 1-2

Storyline by: Edward D. Hughes

Illustrated by: M. Maillot
and Alastair Paterson

Adapted by: E. Frischbutter; Sarah S.

Ambrym. SouthEast Bible (tvk) © 2015, Wycliffe Bible
Translators, Inc. All rights reserved.

<https://live.bible.is/bible/TVKWBT/MAT/1>

©2026 Bible for Children, Inc.

www.M1914.org

www.bibleforchildren.org

